

STATUT NOGOMETNOG SAVEZA TUZLANSKOG KANTONA

Na osnovu članova 12,13, 14. i 15. Zakona o udruženjima i fondacijama („Službene novine F BiH, broj 45/02“) i člana 73. stav 1. Statuta NS FBiH, a u vezi sa odredbama 24. stav 2. Zakona o sportu TK („Službene novine TK“, broj 8/10) Skupština Nogometnog saveza Tuzlanskog kantona na sjednici održanoj 25.1.2012. godine, usvojila je

STATUT NOGOMETNOG SAVEZA TUZLANSKOG KANTONA

I OSNOVNE ODREDBE

Definicije termina:

- FIFA: Federation Internationale de Football Association (Međunarodna nogometna unija)
- UEFA: Union des Associationis Europeennes de Football (Evropska nogometna unija)
- IFAB: International Football Association Board (Međunarodni nogometni odbor koji je donio Pravila nogometne igre)
- Nogometni/Fudbalski savez Bosne i Hercegovine: udruženje koji se sastoji od dva nogometne/fudbalske saveza organizovana na entitetskim nivoima:
 - a) Nogometni savez Federacije Bosne i Hercegovine (skraćeno: NS FBiH)
 - b) Fudbalski savez Republike Srpske (skraćeno FS RS)
- Nogometni savez Tuzlanskog kantona: udruženje općinskih nogometnih saveza i drugih punopravnih članova sa područja Tuzlanskog kantona
- Općinski nogometni savez: udruženje nogometnih/fudbalskih klubova i drugih punopravnih članova sa područja općine
- Dužnosnik: Svaki član komiteta ili komisije i pojedinci kao što su sudije, pomoćne sudije, treneri i drugi pojedinci odgovorni za tehnička, administrativna i medicinska pitanja u Nogometnom savezu Tuzlanskog kantona
- Igrač: nogometaš registrovan u skladu sa propisima FIFA-e
- Nogomet u savezu: igra koju kontroliše FIFA i koji je organizovana u skladu sa Pravilima nogometne igre
- Skupština: najviše tijelo upravljanja i odlučivanja Nogometnog saveza Tuzlanskog kantona
- Izvršni odbor: izvršno tijelo Nogometnog saveza Tuzlanskog kantona
- Član: pravna ili fizička osoba koju je Skupština primila u članstvo Nogometnog saveza Tuzlanskog kantona
- Delegat: predstavnik općinskog nogometnog saveza, kao i predstavnik drugog punopravnog člana u Skupštini Nogometnog saveza Tuzlanskog kantona
- Redovni sudovi: mjesno i stvarno nadležni sudovi u FBiH koji rješavaju sporove u skladu sa nadležnošću propisanom Ustavom FBiH i Zakonom o sudovima u FBiH
- CAS: Arbitražni sud za sport sa sjedištem Lausanni (Švicarska) kome se strane u sporu koje imaju pravni interes mogu obratiti nakon što iscrpe sva pravna sredstva predviđena Statutom NS/FS BiH i drugim propisima

Napomena: Termini koji se odnose na fizičke osobe važe za oba gramatička roda/spola, a svaki termin u jednini, važi za množinu i obratno.

Član 1.

Nogometni savez Tuzlanskog kantona (u daljem tekstu Savez) je dobrovoljno udruženje Općinskih nogometnih/fudbalskih saveza i drugih punopravnih članova sa područja Tuzlanskog kantona osnovano radi organizovanja i razvoja nogometa na području Tuzlanskog kantona.

Savez je nevladino, nepolitičko i nezavisno sportsko udruženje.

Član 2.

Puni naziv Saveza je: Nogometni savez Tuzlanskog kantona.

Skraćeni naziv Saveza je NS TK-a.

Sjedište Saveza je u Tuzli, ulica Rudarska 63.

Član 3.

Savez predstavlja i zastupa predsjednik Saveza.

Član 4.

Savez ima svojstvo pravne osobe sa pravima, obavezama i odgovornostima utvrđenim Zakonima, drugim propisima i ovim Statutom.

Savez je neprofitabilna osoba, a upisuje se u Registar udruženja koje vodi Ministarstvo pravosuđa i uprave TK-a, te u Registar fizičkih i pravnih osoba u oblasti sporta koji vodi Ministarstvo obrazovanja, nauke, kulture i sporta TK-a.

Službeni jezici Saveza su jezici utvrđeni Ustavom FBiH uz upotrebu latiničnog i ćiriličnog pisma.

Član 5.

Savez ima zastavu i grb.

Zastava Saveza je u obliku pravougaonika, dimenzija 200x100 cm, bijele boje sa grbom u sredini i natpisom Nogometni savez Tuzlanskog kantona.

Grb Saveza je predstavlja nogometna lopta koja se nalazi u granicama Tuzlanskog kantona.

Član 6.

Savez ima pečat i štambilj.

Pečat Saveza je okruglog oblika sa grbom u sredini pečata i izrađuje se u dvije veličine.

Pečat br. 1 (jedan) je prečnika 35 mm sa natpisom po obodu u latiničnom pismu na bosanskom jeziku; NOGOMETNI SAVEZ TUZLANSKOG KANTONA.

Pečat br. 2 (dva) je prečnika 25 mm i izrađuje se za potrebe komisija, te pored naziva NOGOMETNI SAVEZ TUZLANSKOG KANTONA stoji naziv komisije.

Odluku o izradi pečata i štambilja donosi Izvršni odbor Saveza.

Izvršni odbor Saveza svojom odlukom utvrđuje izgled, oblik i tekst štambilja Saveza.

Generalni sekretar Saveza ili zaposlenik Saveza kojeg on pismeno ovlasti odgovoran je za čuvanje i upotrebu pečata i štambilja.

Član 7.

Savez je udružen u Nogometni savez Federacije BiH.

Savez, njegova tijela i službene osobe, članovi saveza, klubovi, igrači, treneri, nogometni suci, službene osobe i drugi pripadnici nogometnog sporta obavezuju se:

- a) postupati u skladu sa Pravilima nogometne igre koje je donio Međunarodni nogometni savez (IFAB) i Pravilima igre za mali nogomet i nogomet na pijesku koja je donio Izvršni komitet FIFA-e, a koja mogu biti izmijenjena i dopunjena samo od strane naprijed navedenih subjekata;
- b) poštovati Statut, pravilnike, odluke i druge akte FIFA-e, UEFA-e, NS/FS BiH, NS FBiH i Saveza;
- c) poštovati principe lojalnosti, integriteta i sportskog ponašanja kao izraze fair-play-a;
- d) priznati nadležnost Arbitražnog suda za sport (CAS) u Lausanni (Švicarska), na način utvrđen odredbama Statuta FIFA-e i UEFA-e, kao i relevantnim odredbama Statuta NS/FS Bosne i Hercegovine;
- e) u posljednjoj instanci, sve sporove nacionalnog karaktera koji proizilaze ili su vezani za primjenu Statuta NS/FS Bosne i Hercegovine i drugih propisa, nakon što se iscrpe sva pravna sredstva predviđena navedenim propisima, strane u sporu mogu pokrenuti pred Arbitražnim sudom za sport (CAS) koji će riješiti sve sporove, isključujući redovne sudove, izuzev ako je to zabranjeno zakonodavstvom Bosne i Hercegovine.

II – CILJEVI i ZADACI

Član 8.

Ciljevi Saveza su da u okviru nadležnosti utvrđenih ovim Statutom i drugim propisima organizuje, rukovodi, razvija, promovise i unapređuje nogometni sport na području Tuzlanskog kantona.

Radi ostvarivanja navedenih ciljeva, Savez ima zadatak da:

- a) organizuje i rukovodi sistemom takmičenja iz svoje nadležnosti
- b) održava izborne Skupštine u istoj godini i u vremenskom periodu između 30-90 dana prije datuma održavanja izborne Skupštine NS FBiH;
- c) saraduje sa NS F BiH, a putem istog sa NS/FS BiH, kao i udruženim članovima;
- d) štiti i poštuje prava i interese svojih članova i da rješava sporove među njima
- e) osigura da svi izbori ili imenovanja u nadležnosti Saveza budu provedeni na zakonit način
- f) plaća članarinu i izmiruju druge finansijske obaveze utvrđene Statutom NS FBiH drugim propisima;
- g) omogućiti svim imenovanim ili izabranim članovima u tijelima i komitetima NS F BiH i NS/FS BiH prisustvo na sjednicama;
- h) pribavi pisanu saglasnost od NS/FS BiH prije uspostavljanja saradnje sa savezima učlanjenim u FIFA-u i UEFU-u

Kao dio naprijed navedenih zadataka, Savez je odgovoran za sljedeće:

- a) utvrđuje opšte organizacione i administrativne principe za nogometni sport u Tuzlanskom kantonu;
- b) brine o unapređenju stručnog rada i osposobljavanju stručnih djelatnika (trenera, instruktora i sudaca) i drugih kadrova za rad u nogometu u Tuzlanskom kantonu;
- c) uspostavljanje saradnje sa vaspitno-obrazovnim ustanovama i drugim organizacijama i institucijama;
- d) utvrđuje obim prava i obaveza članova Saveza. Članovi Saveza su dužni za svoje Statute, prije početka njihove primjene, pribaviti pisanu saglasnost Saveza;
- e) obavljanje i drugih poslova utvrđenih Zakonom, Statutom i drugim propisima.

Član 9

Ciljeve i zadatke navedene u čl. 8. ovog Statuta, Savez obavlja neposrednim i zajedničkim djelovanjem udruženih članova.

Član 10.

Savez je neutralan po pitanjima politike i vjere.

Diskriminacija bilo koje vrste prema državama, osobama ili grupama osoba zasnovana na njihovoj rasi, nacionalnosti, vjeri, polu, jeziku, političkom opredjeljenju ili bilo čemu drugome zabranjena je i predstavlja razlog za suspenziju ili isključenje iz Saveza.

Član 11.

Savez će podsticati prijateljske odnose između svojih članova, klubova, igrača, trenera, sudaca i drugih pripadnika nogometnog sporta.

Član 12.

Savez svoju djelatnost ne smije obavljati radi sticanja dobiti.

Ako u obavljanju djelatnosti Savez ostvari dobit, ona se mora isključivo koristiti za obavljanje i unapređenje djelatnosti Saveza, kojima se ostvaruju ciljevi Saveza, utvrđeni ovim Statutom.

III –ČLANSTVO

Član 13.

Članovi Saveza mogu biti Općinski nogometni/fudbalski savezi i druge pravne i fizičke osobe sa područja Tuzlanskog kantona osnovani u skladu sa odredbama Zakona o sportu TK („Službene novine TK“, broj: 8/10) i drugim propisima i upisani, u skladu sa odredbama čl.4. ovog Statuta, u odgovarajuće registre.

Skupština na osnovu pismenog zahtjeva odlučuje o prijemu kandidata u Savez.

Kandidat za prijem u Savez uz zahtjev prilaže:

1. rješenje o registraciji;

2. statut kandidata (Općinskog nogometnog/fudbalskog saveza ili drugog podnosioca zahtjeva);
3. osnovne podatke o organizaciji i djelatnosti kandidata (broj klubova, rang takmičenja klubova, broj igrača, sudija, trenera i dr.);

Statut kandidata mora sadržavati odredbe iz čl. 7. st. 2. i čl. 60. ovog Statuta.

Nakon Odluke Skupštine Saveza o prijemu u članstvo Saveza, potpisuje se Ugovor o udruživanju čime Općinski nogometni/fudbalski savez ili drugi član stiče svojstvo punopravnog člana Saveza sa pravima, obavezama i odgovornostima utvrđenim Zakonom, ovim Statutom i drugim propisima.

Član 14.

Sa područja jedne općine samo jedan Općinski nogometni /fudbalski savez može biti član Saveza.

Ukoliko sa područja jedne Općine dva ili više Općinskih nogometnih/fudbalskih saveza podnesu zahtjev za prijem u članstvo, Skupština Saveza donosi odluku koji će Općinski nogometni/fudbalski savez biti član Saveza.

Prilikom donošenja odluke Skupština Saveza, na osnovu broja skupljenih bodova, utvrđuje poredak podnosilaca zahtjeva na način da vrši bodovanje pojedinih klubova koji im pripadaju, uzimajući kao kriterij broj i rang klubova koji redovno i stalno učestvuju u ligaškim takmičenjima i to na sljedeći način:

- | | |
|------------------------|-----------|
| a) III kantonalna liga | 1 bod |
| b) II kantonalna liga | 2 boda |
| c) I kantonalna liga | 4 boda |
| d) malonogometni klub | 6 bodova |
| ženski klub | 6 bodova |
| II liga FBiH | 6 bodova |
| e) I liga FBiH | 8 bodova |
| f) Premijer liga BiH | 10 bodova |

Skupština Saveza donosi odluku o prijemu u Savez onog kandidata koji je skupio veći/najveći broj bodova.

IV – PRAVA ČLANOVA

Član 15.

Članovi Saveza imaju prava:

- a) birati delegate u Skupštinu Saveza i putem istih učestvovati u radu Skupštine Saveza;
- b) predlagati, birati i biti biran u tijela i komisije Saveza;
- c) saradivati sa Savezom po svim pitanjima koja se odnose na organizaciju, razvoj i unapređenje nogometa na Tuzlanskom kantonu;
- d) biti obaviješteni o svim aktivnostima Saveza;
- e) u svojstvu gostiju prisustvovati sjednicama Skupštine Saveza;

- f) podnijeti zahtjev za sazivanje Skupštine;
- g) ostvarivati i druga prava utvrđena Statutom i drugim propisima

V – OBAVEZE ČLANOVA

Član 16.

Članovi Saveza, osim onih navedenih u članu 7. st. 2. imaju i sljedeće obaveze:

- a) provoditi odluke i druge akte tijela i komisija Saveza;
- b) osigurati da njihov statut i ostali opći akti, kao i statut i opći akti njihovih klubova, budu usklađeni sa Zakonom, ovim Statutom i ostalim općim aktima ovog Saveza i statutom i ostalim propisima FIFA-e i UEFA-e;
- c) dostaviti Savezu svoje statute, kao i izmjene i dopune istih;
- d) da njihovi klubovi i igrači učestvuju u takmičenjima;
- e) plaćati članarinu i izmirivati druge finansijske obaveze utvrđene ovim Statutom i drugim propisima;
- f) dostavljati Savezu izmjene kod osoba ovlaštenih za zastupanje;
- g) voditi ažurirani popis članova;
- h) osigurati da svi izbori ili imenovanja u njihovoj nadležnosti budu provedeni na zakonit način;
- i) održavati Skupštine najmanje jednom u toku godine i izborne Skupštine u istoj godini i u vremenskom periodu između 30-90 dana prije datuma održavanja izborne Skupštine Saveza;
- j) omogućiti svim imenovanim ili izabranim članovima u tijelima i komitetima Saveza prisustvo na sjednicama;
- k) ostale obaveze koje proizilaze iz ovog Statuta i općih akata Saveza, FIFA-e i UEFA-e, te Statuta i drugih propisa NS/FS BiH i NS FBiH

VI - SUSPENZIJA, PRESTANAK ČLANSTVA

Član 17.

Izvršni odbor Saveza može suspendovati člana koje djeluje suprotno odredbama Zakona, Statuta NS/FS BiH, Statuta NS/FS FBiH, ovog i svog Statuta ili Statuta FIFA-e i UEFA-e, te u slučaju kada nije moguće utvrditi ko je ovlašten za zastupanje člana Saveza.

Suspenzijom član privremeno gubi prava iz članstva.

Suspenzija prestaje kada Izvršni odbor Saveza utvrdi da su prestali razlozi zbog kojih je donesena odluka o suspenziji.

Ukoliko član i nakon suspenzije nastavi djelovati protivstatutarno, na prvoj sjednici Skupštine Saveza donijeeće se odluka o njegovom isključenju iz Saveza.

Član 18.

Članstvo u Savezu prestaje:

- a. brisanjem člana iz Registra udruženja i Registra fizičkih i pravnih osoba navedenih u čl.4.st.2. ovog Statuta;
- b. ako se utvrdi da je član prestao djelovati ili ako nije održao Skupštinu najmanje dvije godine;
- c. na vlastiti zahtjev uz obrazloženje;
- d. ukoliko član djeluje suprotno odredbama čl.12. st 1. ovog Statuta

Odluku o prestanku članstva donosi Skupština Saveza.

Finansijske obaveze koje su nastale prema Savezu do trenutka prestanka članstva, ostaju obaveza dosadašnjeg člana.

VII – ORGANIZACIJA SAVEZA

Član 19.

Savez ima sljedeća tijela (a, b,d, e i f):

- a) Skupština Saveza (u daljnjem tekstu: Skupština) je najviše tijelo upravljanja i odlučivanja u Savezu
- b) Izvršni odbor je najviše izvršno tijelo Saveza
- c) Predsjednik Saveza (osoba ovlaštena za predstavljanje i zastupanje Saveza)
- d) Generalni sekretar je administrativni izvršni direktor Sekretarijata/Stručne službe Saveza
- e) Pravna tijela su Disciplinska komisija i Apelaciona komisija
- f) Stalne i ad hoc komisije su radna tijela Izvršnog odbora

VIII – SKUPŠTINA

Član 20.

Skupštinu Saveza čini predstavnici udruženih članova, odnosno delegati općinskih nogometnih/fudbalskih saveza, kao i predstavnici drugih punopravnih članova.

Skupština broji 31 delegata, s mogućnošću da taj broj, u skladu sa kriterijima za utvrđivanje strukture i broja delegata, bude veći ili manji.

Broj delegata, nakon što se na način predviđen čl. 14. ovog Statuta izvrši bodovanje, utvrđuje se tako što udruženim članovima, odnosno općinskim nogometnim/fudbalskim savezima, u zavisnosti od broja skupljenih bodova, pripada određeni broj delegata u Skupštini i to:

- | | |
|-----------------|------------|
| a) do 15 bodova | 1 delegat |
| b) 16-30 bodova | 2 delegata |

- | | |
|-----------------|------------|
| c) 31-45 bodova | 3 delegata |
| d) 46-60 bodova | 4 delegata |
| e) 61-75 bodova | 5 delegata |

Delegat u Skupštini može biti osoba koja je:

- državljanin BiH,
- ima prebivalište na području Tuzlanskog kantona
- navršilo 18 godina (ali manje od 70 godina u vrijeme imenovanja)
- izabrani ili imenovani član u nekom od organa ili tijela članova
- aktivan u nogometu

Delegat u Skupštini ne može biti:

- član Izvršnog odbora Saveza,
- Predsjednik Saveza
- Generalni sekretar Saveza,
- član pravnih tijela Saveza (Disciplinske i Apelacione komisije);
- osoba pravomoćno osuđena na kaznu zatvora dužu od tri mjeseca pravo, sve dok ne proteknu tri godine od izdržane, oprostene ili zastarjele kazne;
- osoba protiv koje se vodi krivični postupak

Član 21.

Članovi Saveza dostavljaju Sekretarijatu Saveza listu svojih delegata koji su pravovaljano izabrani na njihovoj Skupštini, najkasnije 45 (četrdesetpet) dana prije održavanja Skupštine,

Članovi Saveza, pored delegata, biraju i po 1 (jednog) (čl. 20. st.3. tač.a i b), odnosno 2 (dva) (čl. 20. st.3. tač.c i d), zamjenska delegata Skupštine.

Delegati i zamjenski delegati su, najkasnije 30 dana prije održavanja Skupštine na kojoj će biti izvršena verifikacija njihovih mandata, dužni u Sekretarijat Saveza da dostave dokaze o ispunjavanju uvjeta iz čl.20. st. 4. (tač. a,b,c) i st. 5. (tač. d i e), kao i biografiju.

Mandat delegata počinje da teče od dana verifikacije njegovog mandata u Skupštini, a ističe danom verifikacije mandata delegata novog-sljedećeg saziva Skupštine.

Delegat koji nije u mogućnosti da prisustvuje Skupštini, dužan je o tome odmah pisanim putem obavijestiti Generalnog sekretara Saveza, kako bi isti, za tu Skupštinu, uputio poziv zamjenskom delegatu.

Glasanje putem: punomoćnika, dopisa, telefonom i mail-om nije dozvoljeno.

Skupština poslove iz svoje nadležnosti obavlja na sjednicama, a može zasjedati kao redovna ili vanredna.

Način rada, prava i obaveze delegata u Skupštini, kao i druga pitanja značajna za efikasan rad Skupštine uređuju se Poslovníkom o radu Skupštine.

A – REDOVNA SKUPŠTINA

Član 22.

Redovna Skupština se održava najmanje jednom godišnje, a obavezno u roku od 3 (tri) mjeseca po isteku fiskalne godine.

Odluku o sazivanju redovne Skupštine donosi Izvršni odbor po sopstvenoj inicijativi ili na pisani zahtjev članova Saveza koji u Skupštini imaju više od polovine delegata.

Izvršni odbor utvrđuje prijedlog dnevnog reda Skupštine, te određuje koje će osobe, pored onih navedenih u sljedećem stavu, pozvati na Skupštinu.

Poziv za održavanje Skupštine sa prijedlogom dnevnog reda, mjestom, datumom i vremenom održavanja i potrebnim materijalima Generalni sekretar dostavlja delegatima Skupštine, članovima Saveza i Izvršnog odbora najkasnije 30 (trideset) dana prije održavanja Skupštine.

Izvršni odbor u roku navedenom u prethodnom stavu utvrđuje i broj članova Saveza i listu delegata Skupštine sa pravom glasa.

Delegati Skupštine i članovi Saveza, najkasnije u roku u roku od 15 (petnaest) dana prije datuma održavanja Skupštine, mogu Izvršnom odboru podnijeti prijedlog za izmjene i dopune predloženog dnevnog reda koji mora biti obrazložen u kom slučaju Izvršni odbor održava sjednicu na kojoj razmatra i odlučuje o izmjenama i dopunama predloženog dnevnog reda i utvrđuje konačan dnevni red Skupštine.

Generalni sekretar je dužan, potrebne materijale sa konačno utvrđenim dnevnim redom, dostaviti subjektima navedenim u st.4. ovog čl., najmanje 10 (deset) dana prije datuma održavanja Skupštine.

Za organizaciju i pripremanje sjednica Skupštine odgovoran je Izvršni odbor kome podršku pružaju nadležna tijela i stručne službe Saveza.

Član 23.

Skupština (redovna i vanredna) se može održati i pravovaljano odlučivati ukoliko je prisutno 2/3 od ukupnog broja delegata koji čine Skupštinu.

Ako nije postignut kvorum za odlučivanje iz prethodnog stava ovog člana Skupština se odgađa za određeni sat istog dana ili za drugi dan i sat, uz obavezu da se sjednica sa istim dnevnim redom zakaže najkasnije u roku od 15 dana od prvobitno zakazane sjednice.

Ako se u toku sjednice utvrdi da više nema kvoruma, sjednica se prekida i određuje termin za nastavak iste.

U slučaju iz stava 2. ovog člana Skupština se može održati i pravovaljano odlučivati ukoliko je prisutno više od polovine delegata od ukupnog broja delegata koji čine Skupštinu (50% + 1).

B - VANREDNA SKUPŠTINA

Član 24.

Vanrednu Skupštinu saziva Izvršni odbor na pisani zahtjev članova Saveza koji imaju najmanje 1/3 delegata Skupštine. Zahtjev se dostavlja Generalnom sekretaru Saveza, a isti mora biti obrazložen, te sadržavati prijedlog dnevnog reda.

Ukoliko je pravovaljano podnešen zahtjev za sazivanje vanredne Skupštine ista se mora održati najkasnije u roku od 30 dana od dana podnošenja zahtjeva. Poziv za Skupštinu sa dnevnim redom delegatima Skupštine, članovima Saveza i članovima Izvršnog odbora dostavlja Generalni sekretar Saveza, najkasnije 15 dana prije datuma održavanja Skupštine.

Dnevni red vanredne Skupštine se ne može mijenjati.

Član 25.

Sjednicom Skupštine predsjedava Predsjednik Saveza.

U slučaju odsutnosti ili spriječenosti predsjednika da prisustvuje sjednici Skupštine, sjednicom predsjedava dopredsjednik Saveza, a u njegovoj odsutnosti najstariji delegat Skupštine.

C- IZBORI

Član 26.

Izbori se vrše tajnim glasanjem.

Sve druge odluke Skupština donosi javnim glasanjem, ukoliko ne odluči drugačije.

Suspendirani članovi nemaju pravo glasa.

Izabranim se smatra kandidat koji je dobio većinu glasova ukupnog broja delegata Skupštine.

Ukoliko ni jedan kandidat nije dobio većinu glasova prisutnih delegata na Skupštini u prvom krugu, izbori se ponavljaju, a u drugom krugu učestvuju dva kandidata koji su u prvom krugu dobili najveći broj glasova.

D- NADLEŽNOSTI SKUPŠTINE

Član 27.

Skupština ima sljedeće nadležnosti

1. donosi i mijenja Statut Saveza;
2. donosi i mijenja Poslovnik o radu Skupštine;
3. donosi i mijenja Poslovnike o radu pravnih tijela Saveza;
4. odlučuje o prijemu ili isključenju člana Saveza
5. bira i razrješava predsjednika i dopredsjednika Saveza;

6. verifikuje i razrješava članove i zamjenske članove Izvršnog odbora predložene od strane članove Saveza;
7. verifikuje delegate i zamjenske delegate u Skupštinu Saveza predložene od strane članova Saveza;
8. razrješava delegate u Skupštini Saveza;
9. bira i razrješava pravna tijela Saveza;
10. razmatra i odlučuje o izvještajima o radu pravnih tijela Saveza;
11. bira i predlaže kandidate koji će predstavljati Savez u tijelima NS/FS BiH i NS F BiH;
12. usvaja strukturu takmičenja na nivou Saveza i donosi odgovarajuće provedbene i druge propise;
13. na prijedlog Izvršnog odbora razmatra i donosi Plan aktivnosti sa finansijskim planom Saveza (na godišnjem nivou);
14. na prijedlog Izvršnog odbora razmatra i odlučuje o izvještaju o realizaciji Plana aktivnosti i finansijskog plana Saveza;
15. na prijedlog Izvršnog odbora imenuje neovisnog revizora Saveza, te razmatra i odlučuje o izvještaju revizora Saveza;
16. razmatra i odlučuje o Izvještaju o radu Izvršnog odbora;
17. predlaže kandidate koji će predstavljati Savez u tijelima NS/FS BiH i NS F BiH;
18. razmatra programe, planove i strukturu za sve vrste takmičenja na nivou Saveza i donosi odluke o istima, a sve na prijedlog Izvršnog odbora Saveza;
19. za pojedine normativne akte, Skupština Saveza, može ovlastiti Izvršni odbor za njihovo donošenje;
20. donosi odluku o prestanku rada Saveza;
21. obavlja sve druge poslove koji ovim Statutom ili drugim propisom nisu stavljani u nadležnost drugog tijela Saveza.

Član 28.

Mandat delegata u Skupštini traje 4 (četiri) godine.

Delegatu u Skupštini može prestati mandat i prije isteka roka na koji je izabran u slučaju:

- a) smrti;
- b) promjene ili gubitka državljanstva;
- c) danom odjave prebivališta sa područja Tuzlanskog kantona;
- d) podnošenjem pisane ili zapisnički konstatovane ostavke;
- e) pravomoćne presude na kaznu zatvora dužu od tri mjeseca;
- f) ukoliko delegat dva puta uzastopno neopravdano izostane ili napusti sjednicu Skupštine;
- g) nastupanjem okolnosti zbog kojih više nije u mogućnosti da obavlja tu dužnost (oduzimanjem poslovne sposobnost i dr.)

Ukoliko delegat u Skupštini Saveza bude izabran za predsjednika Saveza, člana Izvršnog odbora ili pravnog tijela Saveze, mandat mu miruje, a član Saveza na istoj sjednici može predložiti zamjenskog delegata. Nakon prestanka nespojive dužnosti, delegat nastavlja sa obavljanjem delegatske dužnosti na osnovu prestanka mirovanja mandata u Skupštini ako,

u roku od 15 dana od dana prestanka obavljanja nespojive dužnosti, podnese pisani zahtjev predsjedniku Saveza.

Mandat naknadno izabranog ili zamjenskog delegata traje do isteka mandata delegata na čiju dužnost je stupio ili do nastavka obavljanja dužnosti delegata kojeg zamjenjuje.

E- DONOŠENJE ODLUKA

Član 29.

Skupština (redovna ili vanredna) odluke donosi 2/3 (dvotrećinskom) većinom glasova ukupnog broja delegata Skupštine kada se razmatraju sljedeća pitanja:

- a) donošenja i mijenjanja Statuta;
- b) prijema i isključenja člana Saveza;
- c) razmatranja progama, planova i struktura za sve vrste takmičenja na nivou Saveza, i donošenja odgovarajućih odluka;
- d) donošenja odluke o prestanku rada Saveza;
- e) druga pitanja o kojima odluči Skupština.

Sve druge odluke Skupština većinom glasova od ukupnog broja delegata Skupštini (50% + 1).

F - ZAPISNIK

Član 30.

Na sjednici Skupštine vodi se zapisnik i biraju ovjerivači zapisnika.

Za vođenje zapisnika na sjednici Skupštine odgovoran je Generalni sekretar.

Zapisnik sa održane sjednice Skupštine potpisuje predsjednik/predsjedavajući Skupštine, Generalni sekretar i ovjerivači zapisnika i isti se u roku od 30 (trideset) dana dostavlja delegatima Skupštine.

Ukoliko u narednom roku od 15 (petnaest) dana u Sekretarijat Saveza ne bude dostavljen prigovor, zapisnik se smatra usvojenim,

U protivnom, prigovori se razmatraju i o istima odlučuje na sljedećoj sjednici Skupštine.

IX – IZVRŠNI ODBOR

Član 31.

Izvršni odbor sačinjava po 1 predstavnik udruženih članova-općinskih nogometnih/fudbalskih saveza, s mogućnošću da taj broj, u zavisnosti od broja punopravnih članova, bude veći ili manji.

Članovi Saveza dostavljaju Sekretarijatu Saveza imena 2 (dva) kandidata za člana i zamjenskog člana Izvršnog odbora koji su pravovaljano izabrani na njihovoj Skupštini, najkasnije 45 (četrdesetpet) dana prije održavanja Skupštine

Kandidati za članove i zamjenske članove su dužni, najkasnije 30 dana prije održavanja Skupštine na kojoj će biti izvršena verifikacija njihovih mandata, u Sekretarijat Saveza da dostave dokaze o ispunjavanju uvjeta iz čl. 32. st. 1. (tač. a,b,c) i st.2. (tač. d i e), kao i biografiju.

Mandat članova Izvršnog odbora je četiri godine, uz mogućnost ponovnog izbora.

Kandidat za člana Izvršnog odbora potvrđuje volju za prihvatanje navedene funkcije pred Skupštinom.

Ukoliko nastupe okolnosti zbog kojih član Izvršnog odbora nije u mogućnosti da obavlja svoju dužnost, upražnjeno mjesto, za preostali mandantni period, popunjava njegov zamjenski član.

Član 32.

Član Izvršnog odbora može biti osoba koja je:

- a) državljanin BiH
- b) ima prebivalište na području Tuzlanskog kantona
- c) navršilo 18 godina (ali manje od 70 godina u vrijeme imenovanja)
- d) izabrani ili imenovani član u nekom od organa ili tijela članova Saveza
- e) aktivan u nogometu

Član Izvršnog odbora ne može biti:

- a) delegat u Skupštini Saveza,
- b) Generalni sekretar Saveza,.
- c) član pravnih tijela Saveza (Disciplinske i Apelacione komisije)
- d) osoba pravomoćno osuđena na kaznu zatvora dužu od tri mjeseca, sve dok ne proteknu tri godine od izdržane, oprostene ili zastarjele kazne;
- e) osoba protiv koje se vodi krivični postupak

Član 33.

Članu Izvršnog odbora mandat može prestati i prije isteka roka na koji je izabran, u slučaju:

- a) smrti;
- b) promjene ili gubitka državljanstva;
- c) danom odjave prebivališta sa područja Tuzlanskog kantona;
- d) podnošenjem pisane ili zapisnički konstatovane ostavke;
- e) pravomoćne presude na kaznu zatvora dužu od tri mjeseca;;
- f) ukoliko član Izvršnog odbora u toku godine tri puta neopravdano ili dva puta uzastopno neopravdano izostane sa sjednice Izvršnog odbora;
- g) nastupanjem okolnosti zbog kojih više nije u mogućnosti da obavlja tu dužnost (oduzimanjem poslovne sposobnost i dr.)

Nadležnost Izvršnog odbora

Član 34.

Izvršni odbor ima sljedeće nadležnosti:

- 1) predlaže izmjene i dopune: Statuta, Poslovnika u o radu Skupštine, te Poslovnika o radu njenih pravnih tijela;
- 2) bira i razrješava predsjednika i članove stalnih i povremenih (ad hoc komisija)
- 3) donosi Poslovnike o radu stalnih i povremenih (ad hoc komisija)
- 4) razmatra i odlučuje o izvještajima o radu stalnih i povremenih (ad hoc komisija)
- 5) podnosi Skupštini izvještaj o svom radu;
- 6) donosi odluku o suspenziji i o prestanku suspenzije člana Saveza;
- 7) predlaže Skupštini imenovanje neovisnog revizora Saveza;
- 8) predlaže Skupštini Plan aktivnosti sa finansijskim planom Saveza (na godišnjem nivou);
- 9) sačinjava godišnji izvještaj o realizaciji Plana aktivnosti i finansijskog plana Saveza i upućuje ga Skupštini na razmatranje i odlučivanje;
- 10) po ovlaštenju Skupštine donosi noramativna akta iz njene nadležnosti;
- 11) donosi Pravilnik o unutrašnjoj organizaciji i sistematizaciji poslova i radnih zadataka sekretarijata Saveza;
- 12) donosi program razvoja i unapređenja nogometa na nivou Saveza i u skladu s tim daje uputstva članovima Saveza;
- 13) donosi kalendar i propozicije takmičenja iz svoje nadležnosti;
- 14) imenuje generalnog sekretara Saveza i, kada je to potrebno, imenuje vršioca dužnosti generalnog sekretara;
- 15) utvrđuje opšte i posebne uslove koje mora ispunjavati kandidat za generalnog sekretara, dok ugovorom o radu definiše njegova prava, obaveze i odgovornosti;
- 16) usvaja listu delegata u ligama kojima rukovodi ;
- 17) donosi odluke o izdavanju službenog glasila Saveza, drugih publikacija i stručne literature;
- 18) nadzire rad sekretarijata Saveza;
- 19) po prethodno pribavljenom mišljenju Komisije za propise Saveza, daje pisanu saglasnost na Statute članova Saveza;
- 20) obavlja sve druge poslove koji ovim Statutom ili drugim propisom nisu stavljeni u nadležnost drugog tijela Saveza.

Kalendar sjednica, dnevni red

Član 35.

Sjednice Izvršnog odbora se održavaju po potrebi, a najmanje jednom u 2 (dva) mjeseca. Sjednicu saziva i njom predsjedava predsjednik, a njegovoj odsutnosti ili spriječenosti, dopredsjednik ili član Izvršnog odbora izabran na toj sjednici.

Predsjednik Izvršnog odbora dužan je sazvati sjednicu na zahtjev 1/3 članova Izvršnog odbora, najkasnije u roku od 10 (deset) dana računajući od dana podnošenja zahtjeva.

Članovi Izvršnog odbora mogu, uz zahtjev za sazivanje sjednice, Generalnom sekretaru dostaviti prijedlog dnevnog reda.

Generalni sekretar poziv za sjednicu dostavlja članovima Izvršnog odbora najmanje 7 (sedam) dana prije održavanja sjednice.

Generalni sekretar prisustvuje sjednicama Izvršnog odbora bez prava odlučivanja.

Na poziv, sjednici Izvršnog odbora, bez prava odlučivanja, mogu prisustvovati i osobe čije je izjašnjenje značajno rad utvrđivanja određenih činjenica. Kada prestane potreba za takvom osobom, ona se udaljava sa sjednice.

Kvorum

Član 36.

Izvršni odbor ima kvorum za rad kada sjednici prisustvuje najmanje 2/3 članova.

U slučaju da Izvršni odbor nema kvorum, utvrđen u stavu 1. ovog člana, naredna sjednica Izvršnog odbora se zakazuje u roku od 8 dana, s istim dnevnim redom u kom slučaju je potrebno prisustvo većine članova Izvršnog odbora (50%+1) za pravovaljano donošenje odluka.

Donošenje odluka

Član 37.

Izvršni odbor donosi odluke većinom glasova od ukupnog broja članova.

Odluke se donose javnim, ili ako se za to odluči, tajnim glasanjem.

Pravilnikom o radu Izvršnog odbora i njegovih stalnih i povremenih (ad hoc) komisija detaljnije se uređuje način rada na sjednicama Izvršnog odbora, kao i nadležnost i način rada navedenih komisija.

X - PREDsjedNIK I DOPREDSJEDNIK SAVEZA

Član 38.

Savez ima predsjednika i dopredsjednika.

Predsjednik Saveza je po dužnosti Predsjednik Izvršnog odbora i Odbora za hitnost, te Predsjedavajući Skupštine.

Na kandidate za predsjednika i dopredsjednika Saveza primjenjuju se odgovarajuće odredbe čl.20. ovog Statuta.

Postupak predlaganja i izbora predsjednika i dopredsjednika uređuje se Poslovníkom o radu Skupštine.

Član 39.

Predsjednik:

- a) predstavlja i zastupa Savez;

- b) saziva i predsjedava sjednicama Izvršnog odbora i Odbora za hitnost, te predsjedava sjednicama Skupštine;
- c) potpisuje opće akte koje donosi Skupština, Izvršni odbor i Odbor za hitnost;
- d) brine o izvršavanju odluka, zaključaka i drugih akata Skupštine, Izvršnog odbora i Odbora za hitnost;
- e) obavlja i druge aktivnosti utvrđene ovim Statutom i drugim općim aktima Saveza ili koje su u vezi sa funkcijom predsjednika

U slučaju odsutnosti ili spriječenosti predsjednika da obavlja svoju funkciju, dok traju te okolnosti, zamjenjuje ga dopredsjednik.

Radna tijela Izvršnog odbora - KOMISIJE

Član 40.

Stalne komisije Saveza su savjetodavna tijela Izvršnog odbora i to:

- a) Finansijska komisija;
- b) Komisija za takmičenje;
- c) Tehnička komisija;
- d) Komisija za sportsku medicinu;
- e) Komisija za suđenje i sudije;
- f) Komisija za omladinski nogomet;
- g) Komisija za ženski nogomet;
- h) Komisija za mali nogomet;
- i) Komisija za propise;
- j) Komisija za stadione i bezbjednost;
- k) Komisija za medije;
- l) Komisija za nagrade i priznanja.

Izvršni odbor može po potrebi osnivati ad hoc komisije radi rješavanja posebnih pitanja.

Svaku komisiju čini predsjednik i 2 člana.

Komisija ima kvorum kada sjednici prisustvuje većina članova, a odluke donosi većinom glasova od ukupnog broja članova.

Član 41.

Predsjednika i članove svih komisija imenuje Izvršni odbor na mandat od 4 godine uz mogućnost ponovnog imenovanja.

XI - GENERALNI SEKRETAR

Član 42.

Generalni sekretar je administrativni izvršni direktor Sekretarijata saveza koga imenuje Izvršni odbor i sa kojim zaključuje ugovor o radu.

Generalni sekretar obavlja sljedeće poslove i zadatke:

- a) brine se za zakonitost rada i ispunjavanje zakonom i drugim propisima utvrđenih obaveza Saveza;
- b) donosi opće i pojedinačne akte iz oblasti radnih odnosa za zaposlenike Sekretarijata Saveza
- c) rukovodi Sekretarijatom Saveza i odgovoran je za njegov rad
- d) naredbodavac je za izvršenje finansijskog dijela plana poslovanja Saveza
- e) odgovoran je za izvršenje zaključaka i drugih odluka iz nadležnosti Skupštine i Izvršnog odbora
- f) prisustvuje sjednicama Skupštine, Izvršnog odbora, Odbora za hitnost i pravnih tijela i učestvuje u raspravama, ali bez prava odlučivanja
- g) obavlja i druge poslove utvrđene Statutom, te koje mu povjeri Skupština i Izvršni odbor Saveza

Član 43.

Generalni sekretar je samostalan u svom radu, a odgovoran je za svoj rad Izvršnom odboru.

Prava, obaveze i odgovornosti Generalnog sekretara uređuju se ugovorom o radu.

XII – ODBOR ZA HITNOST

Član 44.

Odbor za hitnost čine predsjednik i dopredsjednik Izvršnog odbora i 2 (dva) člana Izvršnog odbora koja, prema potrebama i okolnostima, imenuje predsjednik Izvršnog odbora.

Generalni sekretar Saveza, na zahtjev predsjednika, saziva sjednice, vodi zapisnik i učestvuje u radu Odbora za hitnost, ali nema pravo odlučivanja.

Zapisnik sa sjednice Odbora za hitnost, Generalni sekretar u roku od 3 (tri) dana dostavlja članovima Izvršnog odbora.

Odbor za hitnost zasjeda i donosi odluke između dvije sjednice Izvršnog odbora u predmetima i o pitanjima iz nadležnosti Izvršnog odbora koja ne trpe odlaganje.

Odbor za hitnost može zasijedati ako sjednici prisustvuju svi članovi, dok se odluke smatraju pravovaljano donesenim ako za njih glasaju 3 člana, ali se u svakom slučaju do iste mora pokušati doći konsenzusom.

U izuzetnim slučajevima, Odbor za hitnost može donositi odluke i putem telefona, telefaksa, pisanim i putem elektronske pošte.

XIII – PRAVNA TIJELA

Član 45.

Pravna tijela Saveza su:

- a) Disciplinska komisija;
- b) Apelaciona komisija.

Predsjednika i članove pravnih tijela bira Skupština na mandat od 4 godine, uz mogućnost ponovnog izbora.

Članovi pravnih tijela ne mogu istovremeno biti delegati u Skupštini Saveza, članovi Izvršnog odbora, niti članovi stalne ili povremene (ad hoc) komisije.

Predsjednici Disciplinske komisije i Apelacione komisije moraju biti diplomirani pravnici.

Nadležnost i način rada, kao i druge odredbe o radu pravnih tijela, detaljnije se uređuju Poslovníkom o radu pojedinih pravnih tijela Saveza.

I na kandidate/članove pravnih tijela primjenjuju se odgovarajuće odredbe čl. 20. ovog Statuta.

Disciplinska komisija

Član 46.

Disciplinska komisija sastoji se od predsjednika i 2 člana i, zbog izbjegavanja sukoba interesa, 2 zamjenska člana.

Disciplinska komisija odluke donosi u skladu sa odredbama Disciplinskog pravilnika NS/FS BiH.

Za održavanje sjednice Disciplinske komisije potreban je kvorum od 2/3 ukupnog broja članova, odnosno 2 člana.

Disciplinska komisija odluke donosi većinom glasova ukupnog broja prisutnih članova Komisije.

1) Disciplinska komisija može izricati sljedeće sankcije:

- za igrače:

- a) opomena,
- b) novčana kazna
- c) zabrana igranja određenog broja utakmica (prvenstvenih, kup ili međunarodnih)
- d) zabrana igranja na određeno vrijeme
- e) isključenje iz kluba
- f) isključenje iz nogometne organizacije

- za funkcionere, stručne i tehničke rukovodioce, trenere i suce:

- a) opomena,
- b) novčana kazna
- c) zabrana suđenja određenog broja utakmica;
- d) zabrana vršenja funkcije na određeno vrijeme;
- e) isključenje iz kluba ili rukovodstva;
- f) isključenje iz nogometne/fudbalske organizacije.

- Za rukovodstva nogometnih/fudbalskih organizacija:

- a) novčana kazna;
- b) uslovna kazna;
- c) zabrana vršenja funkcije na određeno vrijeme;
- d) smjenjivanje sa funkcije;
- e) isključenje iz nogometne/fudbalske organizacije.

- Za klubove

- a) opomena;
- b) novčana kazna;
- c) zabrana igranja utakmica u inozemstvu;
- d) zabrana igranja utakmica na određenom igralištu ili na svim igralištima određenog područja;
- e) zabrana igranja utakmica na svom igralištu u prisustvu gledatelja;
- f) oduzimanje bodova ili negativni bodovi;
- g) vraćanje u niži stepen takmičenja.

Član 47.

Nadležnost, broj članova i način rada Disciplinske komisije uređuje se Poslovníkom o radu Disciplinske komisije.

Apelaciona komisija

Član 48.

Apelaciona komisija se sastoji se od predsjednika i 2 člana i, zbog izbjegavanja sukoba interesa, 2 zamjenska člana.

Za održavanje sjednice Apelacione komisije potreban je kvorum od 2/3 ukupnog broja članova, odnosno 2 člana.

Apelaciona komisija odluke donosi većinom glasova ukupnog broja prisutnih članova Komisije.

Apelaciona komisija u drugostepenom postupku odlučuje o žalbama uložanim u disciplinskom postupku i postupku po žalbama protiv odluka Komisije za takmičenje.

XIV - TAKMIČENJA

Član 49.

Savez je odgovoran za organizaciju takmičenja na nivou Saveza koju mu je u nadležnost prenio NS FBiH.

Savez može delegirati dio svojih odgovornosti iz prethodnog stava na udružene članove.

Član 50.

Takmičenja Saveza su slijedeća: prvenstva u muškom i ženskom, velikom i malom nogometu, prvenstva mlađih kategorija, kao i KUP natjecanje koje mu je u nadležnost prenio NS FBiH.

Pravila takmičenja

Član 51.

Izvršni odbor donosi pravila za takmičenje na nivou Saveza i za druga takmičenja koja su u njegovoj nadležnosti.

Zabrana udruživanja ili saveza

Član 52.

Udruženi članovi i njihovi klubovi ne mogu formirati udruženje ili saveze bez odobrenja od strane Saveza.

H – SPOROVI

Član 53.

Udružene članice, klubovi, članovi klubova i službena osobe Saveza ne mogu sporove koji proističu iz organizacije nogometnog takmičenja, odigranih utakmica, kao i druge sporove koji su u nadležnosti organa, tijela i komisija Saveza iznositi pred građanske/redovne/sudove, niti mogu voditi sudske i upravne postupke.

XV - MATERIJALNO FINANSIJSKO POSLOVANJE

Član 54.

Savez ostvaruje prihode:

- 1) vlastitom djelatnošću;
- 2) iz sredstava koje Tuzlanski kanton osigurava u budžetu kantona;
- 3) od kotizacija, članarina i taksi članova Saveza, klubova, igrača, sudija, trenera i ostalih službenih osoba,
- 4) sponzorskih ugovora,
- 5) novčanih kazni koje su izrekla nadležna tijela Saveza,
- 6) dobrovoljnih priloga i drugih izvora u skladu sa zakonom.

Savez snosi troškove predviđene godišnjim finansijskim planom, ostale troškove koje je odobrila Skupština i troškove koje je odobrio Izvršni odbor u okviru svoje nadležnosti, kao i sve ostale troškove proistekle iz realizacije ciljeva Saveza.

Član 55.

Sredstvima koja Savez ostvaruje vlastitom djelatnošću, raspolaže Savez, a odluku o njihovom trošenju donosi Izvršni odbor.

Član 56.

- 1) Raspodjela ukupnih sredstava vrši se finansijskim planom.
- 2) Finansijsko (obračunsko) razdoblje traje jednu godinu i počinje svakog 1. januara i završava svakog 31. decembra.
- 3) Naredbodavac za izvršenje finansijskog plana je Generalni sekretar.

Član 57.

Materijalno-financijsko poslovanje Saveza vodi se u skladu sa zakonskim i podzakonskim propisima.

Član 58.

- 1) Savez može sticati pokretnu i nepokretnu imovinu.
- 2) Izvršni odbor odlučuje o sticanju, prodaji, prenosu na drugu pravnu osobu ili davanju u zakup nepokretne i pokretne imovine.

Član 59.

Savez je obavezan da organizira izradu vjerodostojnih računovodstvenih evidencija i finansijskih izvještaja sačinjenih u skladu sa Zakonom o računovodstvu i reviziji u Federaciji BiH, te reviziju godišnjeg finansijskog izvještaja.

Godišnji finansijski izvještaj usvaja Skupština.

Neovisni revizor koji, na prijedlog Izvršnog odbora, bira Skupština, obavlja reviziju finansijskog poslovanja Saveza u skladu sa Međunarodnim revizijskim standardima (ISA) i svoj izvještaj podnose Skupštini. Revizor se imenuje na razdoblje od godinu dana, sa mogućnošću ponovnog imenovanja u skladu sa Zakonom o računovodstvu i reviziji u Federaciji Bosne i Hercegovine.

Revizor mora ispunjavati uvjete propisane Zakonom o računovodstvu i reviziji u Federaciji Bosne i Hercegovine.

Član 60.

- 1) Članarine dospijevaju za plaćanje na dan 01. aprila tekuće godine. Godišnja članarina za nove članove za tekuću godinu mora biti plaćena u roku od 30 dana od završetka sjednice Skupštine na kojem su primljeni u članstvo.
- 2) Skupština određuje visinu godišnje članarine svake dvije godine, na prijedlog Izvršnog odbora. Članarina je jednaka za sve članove.

XVI - OSTALE ODREDBE

A - ZABRANA RADA I UČESTVOVANJA U NOGOMETNOM SAVEZU

Član 61.

1) Osoba pravomoćno osuđena na kaznu zatvora dužu od tri mjeseca ne može učestvovati u nogometnim takmičenjima, organizovati i voditi nogometna takmičenja, obavljati stručne poslove u nogometu, niti učestvovati u radu skupštine ili drugih tijela saveza tri godine, računajući od dana izdržane, oprostene ili zastarjele kazne.

2) Osoba protiv koje se vodi krivični postupak udaljit će se od učestvovanja u nogometnim takmičenjima, obavljanja stručnih poslova u nogometu i učestvovanja u radu skupštine ili drugih tijela Saveza, do pravomoćnog okončanja postupka.

B - IZUZEĆE

Član 62.

1) U postupcima koje vode tijela i članovi Saveza, kao i pri donošenju odluka koje oni donose, ne mogu sudjelovati osobe - članovi tih tijela koji su direktno zainteresirani u tom predmetu. Član tijela, kad se rješava o prekršaju kluba ili člana kluba čiji je on član, izuzima se prilikom raspravljanja i odlučivanja o tom predmetu.

2) U postupcima drugog stupnja ne mogu sudjelovati osobe koje su sudjelovale u postupku ili pri odlučivanju u prvom stepenu.

C – SEKRETARIJAT/ STRUČNA SLUŽBA SAVEZA

Član 63.

Sekretarijat/stručna služba Saveza obavlja stručne, administrativno-tehničke i pomoćne poslove Saveza.

Član 64.

Bliže odredbe o organizaciji Stručne službe sekretarijata Saveza, općim aktom koji donosi Izvršni odbor Saveza.

Član 65.

Sekretarijat je odgovoran za:

- a) provođenje odluka tijela Saveza;
- b) vođenje računovodstva Saveza;
- c) pripremanje sjednica Skupštine, Izvršnog odbora, stalnih i povremenih (ad hoc) komisija;
- d) vođenje zapisnika na sjednicama Izvršnog odbora, stalnih i povremenih (ad hoc) komisija;

- e) odnose sa javnošću uz konsultaciju sa Generalnim sekretarom i Predsjednikom Izvršnog odbora
- f) administrativnu pomoć i podršku članovima Saveza.
- g) obavljanje drugih poslova predviđenih zakonom, Statutom i drugim propisima.

D - JAVNOST RADA

Član 66.

Rad Saveza je javan.

Javnost rada se ostvaruje:

- pravovremenim dostavljanjem materijala za rasprave članovima tijela Saveza i drugim pozvanim osobama,
- obavještavanjem medija i drugih sredstava javnog informisanja o održavanju sjednica,
- obavještavanjem građana o radu i poslovanju Saveza putem sredstava informisanja i na pres konferencijama, i
- na druge načine.

Savez izdaje svoje službeno glasilo.

E - PRIZNANJA I NAGRADE

Član 67.

- 1) Savez, na osnovu odluke Skupštine, dodjeljuje priznanja i nagrade u znak priznanja i časti za osobit doprinos razvoju nogometnog sporta,
- 2) Pravilnikom o dodjeli priznanja i nagrada koje donosi Izvršni odbor uređuje se postupak, uslovi i način predlaganja kandidata.

F - PRESTANAK RADA SAVEZA

Član 68.

Savez prestaje sa radom na osnovu odluke 2/3 ukupnog broja delegata Skupštine.

U slučaju prestanka sa radom Saveza, nadzor nad imovinom će biti povjeren udruženim članovima do ponovnog formiranja Saveza.

Staranje nad imovinom – udruženi članovi će regulisati posebnim ugovorom.

XVII – PRELAZNE I ZAVRŠNE ODREDBE

Član 69.

U svim slučajevima kada je to potrebno, pored ovog Statuta, Statuta NS/FS BiH, NS F BiH, Pravilnika i Poslovnika, kao i pored odluka nadležnih organa Saveza, primjenjivat će se zakonodavstvo BiH, FBiH i TK-a.

Postupci koji se provode pred organima i tijelima Saveza vode se u skladu sa relevantnim odredbama propisa Saveza, NS/FS BiH i NS F BiH.

Obzirom da, u skladu sa ovim Statutom, članovi Saveza, pored općinskih nogometnih/fudbalskih saveza, mogu biti i udruženja klubova, kao i pojedinaca (sudije, treneri i dr.) koji do sada nisu podnosili zahtjeve za prijem u članstvo, Skupština će utvrditi uslove i kriterije koje, pored zakonskih, moraju ispuniti da bi imali svoje predstavnike u Skupštini i Izvršnom odboru.

Pitanja koja nisu obuhvaćena Statutom

Član 70.

O svim pitanjima koja nisu obuhvaćena ovim Statutom, kao i u slučajevima više sile, odlučuje Izvršni odbor Saveza.

Usvajanje Statuta

Član 71.

Ovaj Statut je usvojen na sjednici Skupštine Saveza održanoj _____
2012. godine.

Stupanje na snagu

Član 72.

Ovaj Statut stupa na snagu 8 (osmog) dana od dana usvajanja.

Izmjene i dopune

Član 73.

Izmjene i dopune Statuta vrše se na način propisan za njegovo donošenje.
Stupanjem na snagu ovog Statuta prestaje da važi Statut Saveza od 13.03.2009.
godine.

Tumačenje Statuta

Član 74.

Za tumačenje odredbi ovog Statuta nadležna je Skupština Saveza.

**XVIII – OBAVEZA USKLAĐIVANJA STATUTA
UDRUŽENIH ČLANOVA**

Član 75.

Obavezuju se udruženi članovi da svoje Statute i druge akte usklade sa ovim Statutom u roku od 90 dana od dana stupanja na snagu ovog Statuta, te da po jedan primjerak svog Statuta dostave Generalnom sekretaru Saveza.

Do usklađivanja sa ovim Statutom, udruženi članovi će, ukoliko nisu u suprotnosti sa ovim Statutom, primjenjivati odredbe važećeg Statuta i drugih akata Saveza.

Generalni sekretar

Predsjedavajući Skupštine:

Broj: _____

Datum: _____ 2012. godine